

von Wulf Wager

Carportkarambolasch



Wo meine Kendr no kloinr gwää send, semmr a paar Mol hendranandr an d' Nordsee en Urlaub gfhara. Des war obachaschee dort droba ond zom Doil hend ons dia Leut dort auf vrstanda.

Mir hend dort äwwl a Feriahäusle gmietet, wo ma dia Kendr em Garda hot sprenga lassa kenna.

's Auto hemmr total vollpackt mit allerhand Zuig. Wenig Klammotta, aber viel Fressalia, weil mr jo nia woiß, ob's do oba en

Norddeutschland et vielleicht ebbes teurer wär wie drhoim. Jedafall hend sich meine Kender scho hendr Köln beschwert, dr Arsch dät ihne weh vom uf de Konservabixahocka. Au mei Frau hot goscht, weil des Kisse, uf dem se gessa isch ond des mir mit gfreorene Maultasche gfüllt hend, ihr langsam aber sicher en kalte Bobbes macha dät. Nadierlich hend mir au onsera Fahrräder uf em Dach mitgnomma dort nauf.

Von derra ganze Romgoscherei von meira Brut ond meim domoliga Weib ben i ganz nervös ond fahrig gworda. Schließlich han i au scho 7 Stond Fahrt hendr mir g'het, wo i en dem kloina Nordseedörfle a'komma ben. Voller Freid ben i en des Carport von dem Feriahäusle neig'fahra. Uf oimol hot's jessasmäßig kracht ond der Fahrradständer, den i mir von meira Nochbere – Sia wissat jo, des 150 Kilo-Prachtsweib – ausglieha han, isch mitsamt denen vier nagelneue Fahrrädla abglada gwää.

Wie durch a Wondr isch em Auto, dem Fahrradträger, dene Fahrrädla on au mir nix bassiert, denn mei Weib hot mit ihrem kalta Fiedle en mords Danz ufgfiehrt. Drbei hend dia mi doch so nerfös gmacht. Am liebschta het i dia Rädla wieder ufglada ond wär hoimgfahra, mitsamt dene halbauftaute Maultascha ...

Bis näggschd Woch' Ihr

Alle Kolumna zom Nochlesa
ondr www.woascht.de
ondr em Facebook em
WulfWager Fanclub